

Panalangin ng mga Kristiyano sa Maghapon
LITURGY OF THE HOURS

PANALANGIN SA TAKIPSILIM

Ika-27 ng Abril, 2025

{ Sunday within the Octave of Easter }



Tumayo at gawin ang tanda ng krus

O Diyos, halina at ako'y tulungan.

— O Panginoon, magmadali ka sa iyong pagdamay.

Papuri sa Ama, at sa Anak, at sa Espiritu Santo.

— Kapara noong una, ngayon at magpasawalang hanggan.
Amen.

AWIT

Ating alalahanin na si Hesus ay namatay
At s'ya'y muling nabuhay para sa 'ting kasalanan.
Siya ang ating Diyos, PANGINOONG nagliligtas,
Sa lahat ng panahon, s'ya ang kaligayahan.

Kung tayo ay mamatay kasama ng PANGINOON,
Mabubuhay din tayong kasama ang PANGINOON.

Ating alalahanin na si Hesus ay namatay
At s'ya'y muling nabuhay para sa 'ting kasalanan.
Siya ang ating Diyos, PANGINOONG nagliligtas,
Sa lahat ng panahon, s'ya ang kaligayahan.

Kung tayo ma'y nagtiis kasama ng PANGINOON,
Tayo ri'y maghahari kasama ng PANGINOON.

Ating alalahanin na si Hesus ay namatay
At s'ya'y muling nabuhay para sa 'ting kasalanan.
Siya ang ating Diyos, PANGINOONG nagliligtas,
Sa lahat ng panahon, s'ya ang kaligayahan.

Lahat ay nasa kanya, kahit ating kalungkutan;
Nasa kanya ang lahat maging ating kagalakan.

Ating alalahanin na si Hesus ay namatay
At s'ya'y muling nabuhay para sa 'ting kasalanan.
Siya ang ating Diyos, PANGINOONG nagliligtas,
Sa lahat ng panahon, s'ya ang kaligayahan.

Lahat ay nasa kanya, kahit ating kaligtasan;
Nasa kanya ang lahat maging ating pagmamahal.

Ating alalahanin na si Hesus ay namatay

At s'ya'y muling nabuhay para sa 'ting kasalanan.
Siya ang ating Diyos, PANGINOONG nagliligtas,
Sa lahat ng panahon, s'ya ang kaligayahan.

Umupo o tumayo

MGA ANTIPONA AT SALMO

Antipona 1

Pumunta sa libingan ni Hesus si Maria Magdalena at ang isa pang Maria, aleluya.

Salmo 110:1-5, 7

(Ang Mesiyas, hari at pari)

Sinabi ng PANGINOON,
Sa Hari ko't PANGINOON,
“Maupo ka sa kanan ko,
Hanggang ang kaaway mo,
Ay lubos na mapasuko, pagkat iyong matatalo.”

Magmula sa dakong Sion,
Ay palalawakin niya ang lupaing iyong sakop;
“At lahat ng kaaway mo'y
Sakupin at pagharian,” gayon ang kanyang utos.

Sasamahan ka ng madla,
Kung dumating ang panahong lusubin ka ng kaaway;
Magmula sa mga bundok,
Lalabas at sasamahan ka ng mga kabataan.

Ang PANGINOON ay may pangako
Na ito'y tiyak mangyayari, ganito ang kanyang saysay:
“Katulad ni Melquisedec,
Gagawin kang saserdote, na hindi na wawakasan.”

Ang PANGINOON ay naroroong
Nakaupo sa kanan mo, at pag siya ay nagalit,
Ang lahat ng mga hari ay tiyak na malulupig.

Sa batis sa lansangan,
Itong hari ay iinom, at sisigla ang katawan;
Sa lakas na tataglayin, matatamo ang tagumpay.

Papuri sa Ama, at sa Anak, at sa Espiritu Santo,
Kapara noong una, ngayon at magpasawalang hanggan. Amen.

Antipona

Pumunta sa libingan ni Hesus si Maria Magdalena at ang isa pang
Maria, aleluya.

Antipona 2

Halina at tingnan kung saan inilibing ang Panginoon, aleluya.

Salmo 114

(Iniligtas ang mga Israelita sa pagkaalipin ng Egipto)

Ang bayang Israel
Sa bansang Egipto'y doon inilabas,
Nang ang lahing ito
Sa bansang dayuhan ay pawang lumikas;
Magmula na noon
Ang lupaing Juda'y naging dakong banal,
At yaong Israel
Ginawa ng Diyos na sariling bayan.

Ang Dagat ng Tambo,
Nang ito'y makita, ay tumakas na rin,
Magkabilang panig
Ng ilog ng Jordan, noon ay humimpil.
Maging mga bundok,
Katulad ng tupa, ay pawang nangingig,
Pati mga burol,
Nangingig na parang tupang maliliit.

Ano ang nangyari,
At ikaw, O dagat, wala nang daluyan?
Ikaw naman, Jordan,
Bakit ang tubig mo'y hindi na dumaloy?
Kayong mga bundok,
Nanginginig kayong tupa ang kapara,
At ang mga burol;
Natakot na parang maliit na tupa?
Ikaw, O daigdig,

Ngayon ay manginig sa harap ng Diyos,
Dapat kang matakot
Sapagkat darating ang Diyos ni Jacob.
Siyang sa dalisdis
Ay nagpapabukal ng saganang tubig,
At magmula roon
Ang tubig na ito ay nagiging batis.

Papuri sa Ama, at sa Anak, at sa Espiritu Santo,
Kapara noong una, ngayon at magpasawalang hanggan. Amen.

Antipona

Halina at tingnan kung saan inilibing ang Panginoon, aleluya.

Antipona 3

Wika ni Hesus: Huwag kayong matakot. Lumakad na kayo at
ibalita sa mga kapatid ko na pumunta sila sa Galilea at doon ako'y
makikita nila, aleluya.

Awit: Pahayag 19:1-7

(Ang kasal ng Kordero)

Purihin ang PANGINOON!
Ang pagliligtas, ang karangalan,
At ang kapangyarihan ay tanging sa Diyos!
Matuwid at tama ang kanyang hatol!

Purihin ninyo ang ating Diyos,
Kayong lahat na mga lingkod niya,
Maging dakila at hamak,
Kayong may banal na takot sa kanya!

Purihin ang PANGINOON!
Sapagkat naghahari ang PANGINOON,
Ang ating Diyos na makapangyarihan sa lahat!
Dapat tayong magalak at magsaya.

Purihin natin ang kadakilaan niya
Dahil sa nalalapit na kasal ng Kordero.
Nakahanda na ang kasintahang babae.
Purihin ang PANGINOON.

Papuri sa Ama, at sa Anak, at sa Espiritu Santo,
Kapara noong una, ngayon at magpasawalang hanggan. Amen.

Antipona

Wika ni Hesus: Huwag kayong matakot. Lumakad na kayo at ibalita sa mga kapatid ko na pumunta sila sa Galilea at doon ako'y makikita nila, aleluya.

Umupo

PAGBASA NG SALITA NG DIYOS

Hebreo 10:12-14

Si Kristo ay minsan lamang naghandog dahil sa mga kasalanan, at iyo'y sapat na. Pagkatapos, lumuklok siya sa kanan ng Diyos. At naghihintay siya roon hanggang sa lubusang puksain sa kanya ng Diyos ang kanyang mga kaaway. Samakatuwid, sa pamamagitan ng isa lamang paghahandog ay kanyang pinapaging-banal magpakailanman ang mga nililinis niya.

Antipona

Ito ang araw na ginawa ng Diyos; magalak tayo at matuwa nang lubos, aleluya.

Tumayo

PAPURING AWIT NI MARIA

Antipona

Kinagabihan ng unang araw ng sanlinggo, ang mga alagad ay nagkakatipon. Nakapinid ang pinto ng bahay. Dumating si Hesus at tumayo sa gitna nila at nagwika: Sumainyo ang kapayapaan, aleluya.

Lukas 1:46-56

Gumawa tanda ng krus

Ang puso ko'y nagpupuri sa Panginoon,
At nagagalak ang aking espiritu dahil sa Diyos na aking tagapagligtas.

Sapagka't nilingap niya ang kanyang abang lingkod!

At mula ngayon, ako'y tatawaging mapalad ng lahat ng salinlahi,

Dahil sa mga dakilang bagay na ginawa sa akin ng
Makapangyarihan —
Banal ang kanyang pangalan!

Kinahahabagan niya ang mga may takot sa kanya,
Sa lahat ng sali't saling lahi.

Ipinakita niya ang lakas ng kanyang mga bisig,
Pinangalat niya ang mga palalo ang isipan.

Ibinagsak niya ang mga hari mula sa kanilang trono,
At itinaas ang mga nasa abang kalagayan.

Binusog niya ng mabubuting bagay ang mga nagugutom,
At pinalayas niyang wala ni anuman ang mayayaman.

Tinulungan niya ang kanyang bayang Istael,
Bilang pagtupad sa pangako niya saating mga magulang,
Kay Abraham at sa kanyang lahi, magpakailanman!

Papuri sa Ama, at sa Anak, at sa Espiritu Santo,
Kapara noong una, ngayon at magpasawalang hanggan. Amen.

Antipona

Kinagabihan ng unang araw ng sanlinggo, ang mga alagad ay
nagkakatiapon. Nakapinid ang pinto ng bahay. Dumating si Hesus
at tumayo sa gitna nila at nagwika: Sumainyo ang kapayapaan,
aleluya.

PANGKALAHATANG PANALANGIN

Manawagan tayo nang may galak sa ating puso kay Kristong
ating Panginoon, na namatay at muling nabuhay, at nabubuhay
magpakailanman para tayo'y tulungan:

— Haring nagtagumpay, panalangin nami'y pakinggan.

Liwanag at kaligtasan ng sangkatauhan,
isugo sa aming mga puso ang apoy ng iyong Espiritu habang
ipinapahayag namin ang iyong muling pagkabuhay.

— Haring nagtagumpay, panalangin nami'y pakinggan.

Tulutang kilalanin ka ng Israel bilang kanilang Mesiyas na matagal
nang hinihintay,

at ang sangkalupaan ay punuin mo ng kaalaman ng iyong kadakilaan.

— Haring nagtagumpay, panalangin nami'y pakinggan.

Panatilihin kaming kaisa ng iyong mga banal,
at kasama nila'y pagkalooban kami ng kapahingahan sa aming mga pagpapagal.

— Haring nagtagumpay, panalangin nami'y pakinggan.

Nagtagumpay ka laban sa kamatayan na iyong kaaway; lupigin sa amin ang kapangyarihan ng kamatayan.
upang kami'y mamuhay nang para sa iyo lamang, Panginoong nagtagumpay at walang hangganan.

— Haring nagtagumpay, panalangin nami'y pakinggan.

Kristong Tagapagligtas, kami'y naging masunurin kahit sa pagtanggap sa kamatayan, at ikaw ay iniluklok sa kanan ng Amang banal,
sa iyong kabutihan, tanggapin ang iyong mga kapatid sa kaharian ng iyong kaluwalhatian.

— Haring nagtagumpay, panalangin nami'y pakinggan.

Ama Namin

Ama namin, sumasalangit Ka
Sambahin ang ngalan Mo
Mapasaamin ang kaharian Mo
Sundin ang loob Mo
Dito sa lupa, para nang sa langit.
Bigyan Mo kami ngayon ng aming kakanin sa araw araw.
At patawarin Mo kami sa aming mga sala,
Para nang pagpapatawad namin
Sa mga nagkakasala sa amin.
At huwag Mo kaming ipahintulot sa tukso,
At iadya Mo kami sa lahat ng masama.
Sapagkat Iyo ang kaharian, at kapangyarihan,
At ang kadakilaan, magpakailanman.

PANGWAKAS NA PANALANGIN

Amang makapangyarihan,
sa pamamagitan ng pagkabuhay ni Kristong iyong Anak
nabuwag ang kapangyarihan ng kamatayan
at binuksan para sa amin ang landas
sa buhay na walang hanggan.

Ang pagdiriwang namin ngayong ginaganap
ay magpanibago nawa sa pamumuhay naming lahat
sa tulong ng Espiritung sa ami'y nagliliwanag,
sa pamamagitan ni Hesukristo,
kasama ng Espiritu Santo magpasawalang hanggan.

— Amen.

Paghayo

Pagpalain nawa tayo ng panginoon, iligtas tayo mula sa lahat ng
kasamaan at akayin tayo sa buhay na walang hanggan.

— Amen.

PANALANGIN NG MGA KRISTIYANO SA MAGHAPON

Ang mga tekstong biblikal at mga Papuring Awit na ginamit ay halaw mula sa MAGANDANG BALITA BIBLIA. Karapatang-sipi @ 1973, Philippine Bible Society, U.N. Ave., Manila.

Ang mga titik ng mga Awit at ang mga disenyong pansining ay likha ni Padre Mar DJ Arenas.

Karapatang-sipi @ 1994, LUPON REHIYONAL UKOL SA TAGALOG SA LITURHIYA.

Archdiocesan Liturgical Commission, Manila



mobile prayers



UNITED STATES OF AMERICA
www.ebreviary.com